



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 040828 21 Iž**  
**Sarajevo, 09.07.2021.godine**

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka, kao predsjednik vijeća, Dinke Bešliagić-Čovrk i Vesne Trifunović, kao članova vijeća, odlučujući o žalbi Begić Senaida, Usorska br. 5, Matuzići, Doboj Jug, izjavljenoj protiv rješenja Centralne izborne komisije Bosne i Hercegovine, broj: 06-1-07-1-361/21 od 24.06.2021.godine, o prestanku mandata tužitelju, poslaniku u Predstavničkom domu Parlamenta Federacije Bosne i Hercegovine, u nejavnoj sjednici, održanoj dana 09.07.2021. godine, donio je

**R J E Š E N J E**

**Žalba se odbija kao neosnovana.**

**O b r a z l o ž e n j e**

Rješenjem Centralne izborne komisije Bosne i Hercegovine, broj i datum navedeni u uvodu, Begić Senaidu, poslaniku u predstavničkom domu Parlamenta Federacije Bosne i Hercegovine izabranom na Općim izborima 2018. godine sa kandidatske liste subjekta SDP – SOCIJALDEMOKRATSKE PARTIJE BOSNE I HERCEGOVINE, utvrđen je prestanak mandata sa danom donošenja odluke, 24.06.2021. godine.

Žalitelj je blagovremeno uložio žalbu na navedeno rješenje navodeći da nije sporno da je pravosnažno osuđen na 2,5 godine zatvora presudom Kantonalnog suda Zenica broj: 43 0 K 169067 20 Kž od 09.04.2021. godine, ali i da je na navedenu presudu izjavio apelaciju Ustavnom sudu BiH, zbog povrede ljudskih prava iz Ustava BiH i Evropske konvencije o ljudskim pravima. Navodi da je mišljenje pravničke struke da je uspjeh navedene apelacije, zbog okolnosti predmeta, u značajnoj mjeri izvjestan, te mu se donošenjem ožalbene odluke nanosi nenadoknadviva šteta. Naime, u slučaju usvajanja apelacije i ukidanja predmetne presude Kantonalnog suda u Zenici, mandat se ne može vratiti. Posebno naglašava da je u radnom odnosu u Predstavničkom domu Parlamenta F BiH, te bi kao posljedicu prestanka mandata izgubio i status profesionalnog zastupnika, a samim tim i radni odnos. Osim toga, u slučaju uspjeha sa apelacijom, to bi imalo za posljedicu enormne troškove za budžet F BiH, zbog budućih sudskih potupaka.

Predlaže da se ukine ožalbena odluka sa uputom Centralnoj izbornoj komisiji BiH da prolongira donošenje odluke najmanje do stupanja na izdržavanje kazne imenovanog.

U odgovoru na žalbu Centralna izborna komisija Bosne i Hercegovine je predložila da se žalba odbaci kao neblagovremena jer je dostavljena tužitelju 02.07.2021. godine, a podnositelj žalbe je podnio žalbu dana 05.07.2021. godine, nakon isteka roka za ulaganje žalbe od dva dana.

U slučaju da se navedeni prijedlog ne usvoji, Centralna izborna komisija je predložila da se žalba odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Uvidom u spis i dostavljenu dokumentaciju, prema shvatanju apelacionog vijeća, CIK BiH je pravilno utvrdila da je Begić Senaid prema presudi Općinskog suda u Zenici broj 43 0 K 169067 19 K od 03.06.2021. godine koja je postala pravosnažna na osnovu presude Kantonalnog suda u Zenici broj: 43 0 K 169067 20 KŽ od 09.04.2021. godine pravosnažno osuđen na jedinstvenu kaznu zatvora u trajanju od 2 godine i 6 mjeseci.

Odredbom člana 1.10. stav (1) tačka 4. Izbornog zakona Bosne i Hercegovine („Sl. glasnik BiH“, broj: 23/01,7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da izabranom članu organa vlasti na svim nivoima prestaje mandat prije isteka vremena na koje je izabran danom pravosnažnosti sudske presude kojom je osuđen na kaznu zatvora u trajanju od šest mjeseci ili duže. Stavom (2) navedenog člana citiranog zakona, Centralna izborna komisija BiH donosi odluku o prestanku mandata izabranom članu organa vlasti u roku koji mne mopže biti duži od 15 dana od dana kada su nastupili razlozi za prestanak mandata, odnosno od saznanja o razlogu za prestanak mandata i o tome obavještava organ vlasti u kojem je izabrani član imao mandat.

Nakon dostavljanja obavijesti od strane Predstavničkog doma Parlamenta Federacije Bosne i Hercegovine od 14.05.2021. godine da je tužitelj presudom Kantonalnog suda u Zenici pravosnažno osuđen na kaznu zatvora u trajanju od dvije godine i šest mjeseci, te shodno tome uputila zahtjev da se imenovnaom utvrdi prestanak mandata, pravilna je i zakonita Odluka Centralne izborne komisije BiH kojom je na osnovu odredbe člana 2.9 stav (1) tačka 14, a u vezi člana 1.10 stav (1) tačka 4. i stav (2) i člana 10.8 Izbornog zakona Bosne i Hercegovine, te člana 11 i 15. Uputstva o dodjeli i prestanku mandata („Službeni glasnik BiH“, broj 37/14 i 29/18) u stavu (1) dispozitiva utvrdila prestanak mandata Begić Senaidu, poslaniku u Predstavničkom domu Parlamenta Federacije Bosne i Hercegovine, izabranom na Općim izborima 2018. godine sa kandidatske liste političkog subjekta SDP-SOCIJALDEMOKRATSKA PARTIJA BOSNE I HERCEGOVINE, a stavom (2) da će upražnjeni mandat iz stava (1) dodijeliti sljedećem kvalifikacionom kandidatu sa liste

političkog subjekta SDP - SOCIJALDEMOKRATSKA PARITJA BOSNE I HERCEGOVINE, nakon pravosnažnosti te odluke.

Prestanak mandata na koje je izabran, u konkretnom slučaju tužitelj, prema navedenoj zakonskoj odredbi, odnosno posljedice prestanka mandata prije isteka vremena nastupaju isključivo uz dva uslova I to: danom pravosnažnosti sudske odluke I da je kazna zatvora utvrđena u trajanju od šest mjeseci ili duže. Kako nije uslovljena početkom ili načinom izvršenja kazne, to se ne može prihvatiti prijedlog žalitelja da se ukine pobijana Odluka sa uputama Centralnoj izbornoj komisiji da u ponovnom postupku prolongira donošenje odluke u vezi sa mandatom žalitelja do stupanja imenovanog na izdržavanje izrečene kazne zatvora.

Imajući u vidu citiranu zakonsku odredbu, nema osnova ni žalbeni navod kojim se ukazuje na podnesenu apelaciju Ustavnom sudu BiH I eventualni uspjeh sa apelacijom.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA  
S U D I J A  
Sreto Crnjak**